

第一名

李錫文

我聽著有人咧唱褒歌

得獎感言

講起來，詩，已經被我拋荒一段無短的時間矣，少年時彼種讀詩、論詩和寫詩的痴怡癡，毋知勾對佗去矣！非常感恩，有這擺的活動，這擺的機會，這擺的靈感，詩，轉來矣！

總是認為：詩，是寫生活；寫詩，是生活。所以我袂當為著想欲得獎才寫詩，嘛袂當因為得獎，才繼續寫詩。

真感謝評審，予閣較濟的人「聽」著褒歌，也予閣較濟的人，唱「褒」歌予我聽。



我聽著有人咧唱褒歌

我聽著有人咧唱褒歌

聲調自然像波浪伸手咧摸沙坪

想一遍歌詞

會當過一段澎湖昨昏的生活

阿公坐東片的海咧眩船

阿媽倚西片的山咧病困

一尾魚煎赤赤

就有知足的芳氣

嘛有家庭和樂的色緻

予囝孫圍過來看

我聽著有人咧唱褒歌

頭一句啖著愛情甜甜的滋味

閣來是世事無常的針咧撼心肝

第三句予人聽了真火大

想欲創作七字來相罵

好佳哉

最後一句有加喇叭

將海鳥順風的祝福

擺放送予堅心等待的垵

佇西嶼

佇七美佇白沙

佇湖西佇馬公佇望安

我聽著有人咧唱褒歌



古厝內的椅條頂
門口埕的榕樹跤
猶有菜瓜旋藤的宅岸
月琴伶海湧會伴奏
厝角鳥伶蠅蚩蟻
也會合聲
有時陣
南風嘛會偷偷學起來
因為伊
真伶意隔壁庄彼个
可愛的小姐

「看你褒歌甲遮會
敢著淡薄來交陪」
我聽著有人咧唱褒歌
若像拍開一个藏真濟寶貝的厝
閣將面上的皺痕笑成野菊花
送一蕊予我
這是島嶼上美麗的文化啦
所有囡仔团的耳空伶喙舌
攏愛流傳過珍貴的一聲一聲
「教我三遍若是會
送你豬跤無掛蹄」
我聽著家己咧唱褒歌
我聽著家己咧唱
褒歌

